

Communicaziun digl cumegn da Surses allas medias (Nr. 07-2021)

Surses: Realisaziun d'en pumtrack fix

Agl Lai Barnagn a Savognin duess neir biagia en pumtrack fix, en percurs circular catramo per velos, skateboards e kickboards. Igls votants decidan aint igl decurs dalla premaveira davart igl project. Aint igl rom d'en barat e collaboraziun cun l'Uniun pumtrack Surses, è sa resulto or dall'ideia primara d'en pumtrack en project extendia per en center da scuntrada e movimaint.

L'ideia da construeir en pumtrack an Surses n'è betg nova, ossa duess en pumtrack fix davantar realitad agl Lai da Barnagn. Segl areal visavi agl implant da minigolf duessan pero aveir plaz ultra digl pumtrack fix er en kidstrail, damai en simpel percurs per unfants e principants scu er en sectour da skateboards.

L'amplificaziun digl project è igl resultat d'ena collaboraziun digl cumegn da Surses cun ena gruppa d'interess, tgi è sa furmada an connex cun igl tema pumtrack. Igls bikers, skaters e scooterists da chella gruppa, on inoltro lour ideias e giaveischs aint igl process da planisaziun ed anritgia uscheia igl project. Per exaimpel ègl previa d'integrar igl areal da skate, tgi era planiso sper igl local da giuventetna a Cunter, aint igl project e da concentrar uscheia tottas purscheidas per skates, scooters u inlineskates ainten en li. Per igls pi pitschens e principants vign erigia en curs separo, per tgi els possan far lour amprenas experientschas da pumtrack da moda pacifica e nundisturbada.

Or dalla gruppa d'interess è nascheida dantant l'Uniun pumtrack Surses. Igl scopo dall'uniun è cunzont da tschartger sponsours, per saveir finantzier las amplificaziuns tgi èn neidas inzieidas digls commembers. Els èn er alla tschertga da voluntaris tgi geidan construeir igl pumtrack. Ulteriouras infurmaziuns sen: www.valsurses.ch/pumtrack

La suprastanza communal benevainta igl grond angaschamaint digls commembers dall'uniun ed è persvadeida tgi chels vegian savia integrar igls basigns digls utilisaders futurs aint igl project e tgi chel seia nia anritgia cotras. Las votantas ed igls votants vignan a decider aint igl decurs dalla premaveira davart la realisaziun digl project. Pispert tg'igl project definitiv è avantmang, vign inoltrada la dumonda da biagier. Cun resalva tgi la radunanza communal Surses conceda igl credit, è la construcziun digl implant planisada per la fegn da stad.

Ulteriouras infurmaziuns dat Adrian Ballat, commember dalla suprastanza communal (telefonign 078 779 06 57) u igl mastral Leo Thomann (telefonign 079 405 96 73).

Tinizong, igls 12 d'avregl 2021



Fotografias simbolicas da «Velosolutions»